



Ք Ա Ղ Վ Ա Ծ Ք Ն Ե Ր
ԳԵՐԱԳՈՒՅՆ ՀՈԳԵՎՈՐ ԽՈՐՀՐԴԻ ՆԻՍՏԵՐԻ
ԱՐՁԱՆԱԳՐՈՒԹՅՈՒՆՆԵՐԻՑ

1957 թ. ՓԵՏՐՎԱՐԻ 8-Ի ՆԻՍՏԻՑ

Գերագույն Հոգևոր Խորհրդի սույն նիստում հանգամանորեն լսվեց Վեհափառ Հայրապետի հաղորդումը Երուսաղեմի Հայոց Պատրիարքարանի շուրջ տեղի ունեցող վերջին իրադարձությունների շուրջ:

Վերջերս ստացված թղթակցությունների և տեղեկությունների լույսի տակ, Գերագույն Հոգևոր Խորհուրդը որոշեց խնդրել Վեհափառ Հայրապետից՝ մի նոր հեռագիր ուղարկել Տ. Եղիշե արքեպիսկոպոս Տերտերյանին, վերջին նախազգուշացումով: Վերջ դնելու Երուսաղեմի հայոց Սրբոց Հակոբյանց վանքի և միաբանության դեմ ուղղված բոլոր տեսակի իր

ձեռնարկումներին և ըստ իր խոստման՝ քաշվելու բոլոր գործերից:

Գերագույն Հոգևոր Խորհրդի սույն նիստում խորին գոհունակությամբ լսվեց Վեհափառ Հայրապետի հաղորդումը Վեհարանի նոր շենքի կառավարության կողմից Մայր Աթոռին վերադարձվելու մասին:

Գերագույն Հոգևոր Խորհուրդը խորին երախտագիտությամբ արձանագրեց Սուրբ-տական կառավարության այս բարյացակամ վերաբերմունքը Մայր Աթոռի հանդեպ, որը մի անգամ ևս արտահայտվում է Վեհարանի նոր շենքի հանձնումով:

1957 թ. ՓԵՏՐՎԱՐԻ 22-Ի ՆԻՍՏԻՑ

Գերագույն Հոգևոր Խորհրդի սույն նիստում գոհունակությամբ լսվեց Վեհափառ Հայրապետի հաղորդումը Հայկական ՍՍՌ Պետական պատկերասրահից և Բնագիտական թանգարանից Մայր Աթոռին հանձնվելիք սրբապատկերների և եկեղեցական ալիքերի մասին:

Գերագույն Հոգևոր Խորհրդի սույն նիստում Վեհափառ Հայրապետը հանգամանորեն խոսեց Մայր Աթոռի տպարանի կազմակերպման նախապատրաստական աշխատանքների մասին՝ տպարանի հանգանակիչ հանձնաժողովի նախագահ պ. Երվանդ Աղաճանյանից ստացված վերջին մխիթարական և ուրախալի տեղեկությունների հիման վրա:

Մայր Աթոռի տպարանի համար Ամերիկայի Միացյալ Նահանգներում հանգանակված է 120000 դոլար, և բարի ցանկություն ու հնարավորություն կա այդ գումարը հասցնելու 150000 դոլարի:

Գերագույն Հոգևոր Խորհուրդը սրախառափառությամբ նշեց Սովետական Հայաստանի բարեխնամ կառավարության բարյացակամությունը Մայր Աթոռի տպարանի մասին առ այն, որ

1) Մայր Աթոռի տպարանին իրավունք է տրվում բոլոր անհրաժեշտ մեքենաներն ու սարքը արտասահմանից ներածել Մ. Էջմիածին՝ առանց մաքսի:

2) Մայր Աթոռի տպարանին իրավունք է տրվում, տպարանական իր բոլոր ծախսերը հոգալու համար, ընդունել տպագրական պատվերներ նաև դանազան գիտական հիմնարկներից՝ Հայկական ՍՍՌ Գիտությունների ակադեմիայից, Մատենադարանից, Պետական թանգարանից և այլ ուսումնական և գիտական հաստատություններից հայագիտական, պատմա-բանասիրական, գեղարվեստական երկերի և աշխատությունների հրատարակության:

Փետրվարի 22-ի իր սույն նիստում Գերագույն Հոգևոր Խորհուրդը զրադվեց նաև Նդիշի արքեպիսկոպոս Տերտերյանի հարցով:

